

摘藻堂四庫全書薈要

史部

欽定四庫全書薈要

史部
通志卷十四



詳校官員外郎臣楊世綸

欽定四庫全書薈要卷八千九百十二

史部

通志卷十四

宋右廸功郎鄭樵漁仲撰

陳紀第十四

武帝 文帝 廢帝 宣帝 後主

高祖武皇帝諱霸先字興國小字法生吳興長城下若里人姓陳氏其本甚微自云漢太丘長實之後也實玄孫晉太尉準準生匡匡生達永嘉中南遷為丞相掾太

子洗馬出為長城令悅其山水遂家焉嘗謂所親曰此
地山川秀麗當有王者興焉二百年後我子孫必鍾斯
運達生康復為丞相掾咸和中土斷故為長城人康生
盱台太守英英生尚書郎公弼公弼生步兵校尉鼎鼎
生散騎侍郎高高生懷安令詠詠生安成太守猛猛生
太常卿道巨道巨生皇考文讚帝以梁天監二年癸未
歲生少儼儼有大志長於謀畧意氣雄傑不事生產及
長涉獵史籍好讀兵書明緯候孤虛遁甲之術多武藝

明達果斷為當時推服身長七尺五寸曰角龍顏垂手
過膝嘗游義興館於許氏夢天開數丈有四人朱衣捧
日而至納之帝口及覺腹內猶熱帝心獨喜初仕鄉為
里司後至建鄴為油庫吏徙為新喻侯蕭映傳教勤於
其事為映所賞及映為吳興太守甚重帝謂僚佐曰此
人將來遠大必勝於我及映為廣州帝為中直兵參軍
隨之鎮映令帝招集士馬先是武林侯蕭諮為交州刺
史以嚴刻失和土人李賁連結數州豪傑同時反臺遣

高州刺史孫罔新州刺史盧子雄將兵擊賁罔等不時
進皆於廣州伏誅子雄弟子畧與罔子姪及其主帥杜
天合杜僧明共舉兵執南江督護沈顗進寇廣州晝夜
苦攻州中震恐帝率精兵救之賊衆大潰天合死僧明
降梁武帝深歎異焉授直閣將軍封新枋縣子仍遣圖
帝貌而觀之其年冬蕭映卒明年帝送喪還至大庾嶺
會有詔以帝為交州司馬與刺史楊暕南討帝益招勇
敢器械精利暕委帝經畧時蕭勃為定州刺史於西江

相會勃知軍士憚遠役因詭說留黠黠集諸將問計帝
曰交州叛渙罪由宗室節下奉辭伐罪故當死生以之
於是鼓行而進軍次交州黠推帝為前鋒所向摧陷賁
竄入屈獠洞中屈獠斬賁傳首建鄴是歲太清元年也
賁兄天寶遁入九真與劫帥李紹隆收餘兵殺德州刺
史陳文戒進圍愛州帝討平之除振遠將軍西江督護
高要太守督七郡諸軍事

二年冬侯景寇逼帝將赴援廣州刺史元景仲陰將圖

帝帝知之與成州刺史王懷明等集兵於南海馳檄以
討景仲景仲縊於閣下帝迎蕭勃鎮廣州時臨賀內史
歐陽頎監衡州蘭裕蘭京禮扇誘始興等十郡共攻頎
頎請援於勃勃令帝救之悉禽裕等仍監始興郡事帝
遣杜僧明胡頎將二千人頓于嶺上并厚結始興豪傑
同謀義舉侯安都張憇等率衆來附蕭勃聞之遣鍾休
悅說停帝帝泣謂休悅曰君辱臣死誰敢愛命僕行計
決矣時蔡路養起兵據南康勃遣腹心譚世遠為曲江

令與路養相結同遏義軍

大寶元年正月帝發始興次大庾嶺大破路養軍進頓南康湘東王繹承制授帝持節明威將軍交州刺史改封南野縣伯於是修理崎頭古城徙居之劉惠騫等望見恒有紫氣冒城上遠近驚異故惠騫等深自結於帝尋改封長城縣侯南江州刺史時寧都人劉藹等資高州刺史李遷仕舟艦兵仗將襲南康帝遣杜僧明等據白石禦之

二年僧明禽遷任送南康斬之承制授帝江州刺史帝
發南康瀨石舊有二十四灘灘多巨石行旅以為難帝
之發也水暴起數丈三百里間巨石皆沒進軍頓西昌
有龍見水濱高五丈五采鮮曜軍人觀者數萬人帝又
嘗獨坐胡牀於閣下忽有神光滿閣廊廡之間並得相
見趙知禮侍側怪而問帝帝笑不答時承制遣征東將
軍王僧辯督衆軍討侯景次益城帝率杜僧明等合三
萬兵會焉時西軍乏食帝先計軍糧五十萬石至是分

三十萬石以資之仍頓巴丘會侯景廢簡文立豫章嗣
王棟帝遣兼長史沈袞奉表於江陵勸進承制授帝平
東將軍揚州刺史領會稽太守三年帝帥師發自豫章
二月次桑落洲時僧辯已發益城會帝于白茅灣乃登
岸結壇刑牲盟約進次大雷軍人杜稜夢雷池君周何
神自稱征討大將軍乘朱航陳甲仗稱下征侯景須臾
便還云已殺景竟三月帝與諸軍進剋姑熟仍次蔡洲
侯景登石頭城望官軍之盛不悅曰一把子人何足可

打密謂左右曰此軍上有紫氣不易可當乃以舡舫貯石沈塞淮口緣淮作城自石頭迄青溪十餘里中樓雉相接僧辯遣杜崩問計於帝帝以諸將不敢當鋒請先往立柵卽於石頭西橫壠築柵衆軍次連八城直出東北賊恐西州路斷亦於東北果林作五城以遏大路帝曰善用兵者如常山之蛇使救首救尾困而無暇今我師既衆賊徒甚寡應分賊兵力以弱制彊乃命諸將分處置兵帝與王琳杜龕等悉力乘之景衆大潰僧辯啓

命帝鎮京口五月齊遣將辛術圍嚴超達於秦郡帝命徐度領兵助其固守齊衆起土山穿地道攻之甚急帝乃自率萬人解其圍振旅南歸承制授帝征北大將軍開府儀同三司南徐州刺史進封長城縣公及王僧辯征陸納於湘州承制命帝代鎮揚州

承聖二年湘州平帝旋鎮京口

三年三月進帝位司空及魏平江陵帝與王僧辯等進啓請晉安王以太宰承制十二月晉安王至自尋陽入

居朝堂給帝班劔二十人

四年五月齊送貞陽侯淵明還主社稷王僧辯納之淵明即位改元天成以晉安王為皇太子初齊之納貞陽也帝固爭之以為不可僧辯不見從帝居常憤歎曰嗣主高祖之孫元皇之子竟有何辜坐致廢黜假立非次此情可知乃密具袍數千領及錦綵金銀以為賞賜之資九月壬寅帝召徐度侯安都周文育等仍部列將士水陸俱進夜發南徐州討王僧辯甲辰帝至石頭前遣

勇士自城北踰入時僧辯方視事聞外白有兵遽走帝
大兵尋至因風縱火僧辯就禽是夜縊之及其子頗於
是廢貞陽侯而奉晉安王即位

紹泰元年壬子詔授帝侍中大都督中外諸軍事車騎
將軍揚南徐二州刺史持節司空班劔鼓吹並如故仍
詔甲仗百人出入殿省霍州刺史杜龕據吳興與義興
太守韋載舉兵逆命辛未帝表自東討留高州刺史侯
安都石州刺史杜稜宿衛臺省甲戌軍至義興秦州刺

史徐嗣徽據城入齊又要南豫州刺史任約舉兵應龕
齊人資其兵食嗣徽乘虛奄至闕下侯安都出戰嗣徽
等退據石頭丁丑載及龕從弟北叟來降帝撫而釋之
仍以載兄鼎知郡事帝以嗣徽寇逼卷甲還都命周文
育進討杜龕十一月己卯齊遣兵五千渡江據姑孰又
遣安州刺史翟子崇楚州刺史劉士榮淮州刺史柳達
摩領兵萬人於湖墅度米粟三萬石馬千匹入石頭帝
乃遣侯安都領水軍夜襲湖墅燒齊船周鐵虎率舟師

斷齊運輸帝領鐵騎自西明門襲之齊人大潰嗣徽留
達摩等守城自率親屬腹心往南州采石以迎齊援先
是太白自十一月丙戌不見十二月乙卯出于東方丙
辰帝盡命衆軍分部甲卒對冶城立航度兵攻其水南
二柵柳達摩等度淮置陣帝督兵疾戰縱火燒柵煙塵
漲天齊人大潰盡收其船艦是日嗣徽約等領齊兵還
據石頭帝遣侯安都領水軍襲破之嗣徽等單舸脫走
丁巳拔石頭南岸柵移度北岸起柵以絕其汲路又堙

塞東門故城中諸井齊所據城中無水水一合貿米一
升一升米貿絹五匹或炒米食之達摩謂其衆曰頃在
北童謡云石頭擣兩襠擣青復擣黃侯景服青已倒於
此今吾徒衣黃豈謡言驗邪庚申達摩遣侯子欽劉士
榮等請和帝許之乃於城外盟約其將士恣其南北辛
酉帝出石頭南門陳兵送齊人歸北者及至齊人殺之
壬戌齊和州長史烏丸遠自南州奔還歷陽江寧令陳
嗣黃門侍郎曹朗據姑孰不從帝命侯安都徐度等討

平之聚其首為京觀是月杜龕以城降

二年正月癸未誅龕其弟翕從弟北叟司馬沈孝敦並
賜死三月戊戌齊遣水軍儀同蕭軌庫狄伏連堯難宗
東方老侍中裴英起東廣州刺史獨孤辟惡洛州刺史
李希光并任約徐嗣徽王僧愔等衆十萬出柵口向梁
山帳內盪主黃叢逆擊破之燒其前軍船艦齊頓軍保
蕪湖五月丙申齊兵至秣陵故城己亥帝率宗室王侯
及朝臣於大司馬門外白虎闕下刑牲告天以齊人背

約發言慷慨涕泗交流士卒觀者益奮辛丑齊軍於秣陵故城跨淮立橋柵引度兵馬癸卯自方山進及兒塘游騎至臺都下震駭帝潛以精卒三千配沈泰度江襲齊行臺趙彥深於瓜步獲其舟粟六月甲辰齊兵潛至鍾山龍尾丁未進至莫府山帝遣錢明領水軍出江乘要擊齊人糧道盡獲之齊軍大餒殺馬驢而食之壬子齊軍至元武湖西北莫府山南將據北郊壇衆軍自覆舟東移頓郊壇北與齊人相對其夜大雨震電暴風拔

木平地水丈餘齊軍晝夜坐立泥中縣高以繫足指皆爛而臺中及潮溝北水退路燥官軍每得番易甲寅少霽是時食盡調市人餽軍皆是麥屑為飯以荷葉裹而分給間以麥餅兵士皆困會文帝遣送米三千石鴨千頭帝即炊米煮鴨誓申一戰士及防身計糧數鬻人人裹飯混以鴨肉帝命衆軍蓐食攻之齊軍大潰執嗣徽及其弟嗣宗斬之以徇虜蕭軌東方老王敬寶李希光裴英起王僧智等將帥四十六人其軍士得竄至江者

縛筏以濟中江而溺流屍至京口者彌岸惟任約王僧
惔獲免先是童謠云虜萬夫入五湖城南酒家使虜奴
自晉宋以後經絳在魏境江淮以北南人皆謂為虜是
時以賞俘買酒者一人裁得一醉丁巳衆軍出南州燒
賊舟己未斬劉歸義徐嗣產傳野猪于建康市是日解
嚴庚申誅蕭軌東方老王敬寶李希光裴英起等

太平元年九月壬寅帝進位丞相錄尚書事鎮衛大將
軍揚州牧進封義興郡公庚申追贈皇考侍中光祿大

夫封義興郡公諡曰恭十月甲戌梁帝勅丞相自今問訊可施別榻以近宸坐

二年正月壬寅詔加帝班劍十人并前為三十丁未詔贈皇兄道談南兖州刺史長城縣公諡曰昭烈皇弟休光侍中南徐州刺史武康縣侯諡曰忠壯甲寅遣兼侍中謁者僕射陸繕策拜長城縣夫人章氏為義興國夫人丁卯詔贈皇祖侍中太常卿諡曰孝追封皇祖妣許氏吳郡嘉興縣君諡曰敬皇祖妣張氏義興國太夫人

諡曰宣二月庚午蕭勃舉兵自廣州度嶺頓南康遣其將歐陽頎傳泰及其子孜為前軍至豫章分屯要險南江州刺史余孝頃起兵應勃帝命周文育侯安都率眾討平之八月甲午帝進位太尉加黃鉞劔履上殿入朝不趨贊拜不名丙申加前後部羽葆鼓吹是時湘州刺史王琳擁兵不應命遣周文育侯安都率眾討之九月辛丑梁帝進帝位相國總百揆以南豫州之陳留南丹陽宣城揚州之吳興東陽新安新寧南徐州之義興江

州之鄱陽臨川十郡封帝為陳公備九錫之禮加璽紱
遠游冠綠綬綬位在諸侯王上陳國置丞相以下一遵
舊式十月戊辰梁帝又進帝爵為王以揚州之會稽臨
海永嘉建安南徐州之晉陵信安江州之尋陽豫章安
成廬陵并前為二十郡益封陳國其相國揚州牧鎮衛
大將軍並如故又命陳王冕十有二旒建天子旌旗出
警入蹕乘金根車駕六馬備五時副車置旄頭雲罕樂
儼八佾設鍾虞宮縣王妃王子王女爵命之號陳臺百

官一依舊典卒未梁帝策書禪位于陳遣兼太保尚書
左僕射王通兼太尉司徒左長史王瑒奉皇帝璽紱受
終之禮一依唐虞故事是日梁帝遜于別宮帝謙讓再
三羣臣固請乃許之

永定元年冬十月乙亥皇帝即位于南郊升壇柴燎告
類上帝先是氛霧雨雪晝夜晦冥至是日景氣清晏禮
畢輿駕還宮臨太極前殿大赦改元賜百姓爵二級文
武位三等鰥寡孤獨不能自存者人穀五斛逋租宿責

皆勿復收有犯鄉論清議贓污淫盜者皆洗除先注與之更始其長徒勅繫特皆原之亡官失爵禁錮奪勞一依舊典又詔以江陰郡奉梁主為江陰王行梁正朔車旗服色一依前準梁皇太后為江陰國太妃皇后為江陰國妃又詔百司各依位攝職丙子幸鍾山祭蔣帝廟戊寅幸華林園覽辭訟臨赦囚徒己卯分遣大使宣勞四方庚辰詔出佛牙於杜姥宅集四部設無遮大會辛巳追尊皇考曰景皇帝廟號太祖皇妣董太夫人曰安

皇后前夫人錢氏為昭皇后世子克為孝懷太子立夫人章氏為皇后癸未尊景帝陵曰瑞陵昭皇后陵曰嘉陵依梁初園陵故事立刪定郎刊定律令戊子遷景皇帝神主祔于太廟是月西討都督周文育侯安都於郢州敗績没于王琳十一月丙申封皇兄子長城縣侯禧為臨川郡王頊襲封始興郡王皇弟子曇朗襲封南康郡王庚申都下火十二月庚辰皇后謁太廟是歲周閔帝元年及九月冢宰宇文護廢閔帝而奉明帝又為明

帝元年

二年春正月乙未以車騎將軍開府儀同三司侯瑱為
司空辛丑祀南郊大赦甲寅遣中書舍人韋鼎策吳興
楚王神為帝戊午祀明堂二月壬申南豫州刺史沈泰
奔齊辛卯詔司空侯瑱總督水陸衆軍以禦齊三月王
琳立梁永嘉王蕭莊以奉梁後即位于郢州夏四月甲
子祀太廟乙丑江陰王殂陳志也追諡梁敬帝詔太宰
弔祭司空監護喪事以梁武林侯蕭諮子季卿嗣為江

陰王戊辰重雲殿東鵠尾有紫煙屬天五月乙未都下
地震壬寅立梁邵陵攜王廟室祭以太牢辛酉帝幸大
莊嚴寺捨身壬戌羣臣表請還宮六月己巳詔司空侯
瑱領軍將軍徐度討王琳初侯景之平也太極殿被焚
承聖中議欲營之獨闕一柱秋七月有樟木大十八圍
長四丈五尺流泊陶家後渚監軍鄒子度以聞詔中書
令沈衆兼起部尚書構太極殿八月周文育侯安都等
於王琳所逃歸自劾廷尉卽日引見宥之並復本官丁

亥加江州刺史周迪平南將軍開府儀同三司冬十月

庚午遣鎮南將軍周文育都督衆軍出豫章討余孝勳

乙亥幸莊嚴寺發金光明經題丁酉加高州刺史黃法

氈平南將軍開府儀同三司十二月甲子幸大莊嚴寺

設無碍大會捨乘輿法物羣臣備法駕奉迎卽日還宮

丙戌加北江州刺史熊曇朗平西將軍開府儀同三司

三年春正月丁酉鎮南將軍廣州刺史歐陽頔卽本號

開府儀同三司是夜大雪及旦太極殿前有龍跡見甲

子廣州言仙人見于羅浮山寺小石樓二月辛酉加平

西將軍桂州刺史淳于量鎮西大將軍開府儀同三司

夏閏四月甲午詔依前代置西省學士兼取伎術士是

時久不雨丙午幸鍾山祭蔣帝廟是日降雨迄于月晦

五月丙辰朔日有食之有司奏舊儀帝御前殿服朱紗

袍通天冠詔曰此乃前代承用意有未同合朔仰助太

陽宜備袞冕之服自今永可為準丙子扶南國遣使朝

貢乙酉北江州刺史熊曇朗殺都督周文育舉兵反王

琳遣其將常衆愛曹慶率兵援余孝勸六月戊子儀同
侯安都敗衆愛等於左里獲琳從弟襲主帥羊疎等四
十餘人衆愛遁走庚寅廬山人斬之傳首建鄴甲午衆
軍凱歸丁酉帝不豫遣兼太宰尚書右僕射王通以疾
告太廟兼太宰中書令謝哲告太社南北郊辛丑帝小
瘳故司空周文育之柩至自建昌壬寅帝素服哭于朝
堂哀甚癸卯上臨訊獄訟是夜熒惑在天尊上疾甚丙
午帝崩于璿璣殿時年五十七遺詔追臨川王綽入繼

大業甲寅殯于太極殿西階八月甲午羣臣上諡曰武
皇帝廟號高祖丙申葬萬安陵帝雄武多英畧性甚仁
愛及居阿衡恒崇寬簡雅尚儉素常膳不過數品私饗
曲宴皆瓦器蟠盤肴核庶羞裁令充足不為虛費初平
侯景及立敬帝子女玉帛皆班將士其充闈房者衣不
重采飾無金翠聲樂不列於前踐阼之後彌厲恭儉故
能隆功茂德光于江左云

武帝永定三年

世祖文皇帝諱蒨字子華始興昭烈王之長子也少沈

敏有識量美容儀留意經史武帝甚愛之常稱吾家英

秀梁太清初帝夢兩日鬪一大一小大者光滅墜地色

正黃其大如斗帝三分取一懷之侯景之亂避難臨安

縣郭文舉舊宅及武帝舉兵南下景遣吳興太守信都

遵收帝及衡陽獻王出都帝乃密袖小刀候見景欲圖

之及至以付郎中王翻幽守故其事不遂武帝圍石頭

景欲加害者數矣會景敗乃得出起家吳興太守武帝

之討王僧辯也先召帝與謀時僧辯壻杜龕據吳興兵衆甚盛武帝密令帝還長城立柵備之龕遣將杜泰乘虛掩至將士相視失色帝言笑自若部分益明於是衆心乃定及武帝遣周文育討龕帝遣將軍劉騰蔣元舉攻下龕拜會稽太守武帝受禪立為臨川王夢梁武帝以寶刀授已周文育侯安都之敗於沌口武帝詔帝入總軍政尋命率兵城南皖永定三年六月丙午武帝崩皇后稱遺詔徵帝入纂皇統甲寅至自南皖入居中書

省皇后令帝嗣膺寶籙帝辭讓至於再三公卿固請其
日即皇帝位於太極前殿大赦詔州郡悉停奔赴秋七
月丙辰尊皇后為皇太后辛酉以司空侯瑱為太尉以
南豫州刺史侯安都為司空以南徐州刺史徐度為侍
中中撫軍將軍開府儀同三司乙丑重雲殿災八月庚
戌立皇子伯茂為始興王奉昭烈王後徙封始興嗣王
頊為安成王九月辛酉立皇子伯宗為皇太子王公以
下賜帛各有差乙亥立妃沈氏為皇后冬十月甲子齊

文宣帝殂十一月乙卯王琳寇大雷詔太尉侯瑱司空
侯安都儀同徐度禦之是歲周明帝改天王稱皇帝復
建年號曰武成元年

天嘉元年春正月癸丑大赦改元詔賜鰥寡孤獨不能
自存者人粟五斛孝悌力田殊行異等加爵一級甲寅
分遣使者宣勞四方辛酉祀南郊詔賜民爵一級二月
丙申太尉侯瑱敗王琳于梁山敗齊兵于博望禽齊將
劉伯球王琳及其主蕭莊奔齊庾子分遣使者齎璽書

宣勞四方乙巳遣太尉侯瑱鎮益城庚戌立武帝第六子昌為衡陽王三月丙辰蕭莊所署郢州刺史孫瑒舉州內附丁巳江州刺史周迪平南中斬賊帥熊曇朗傳首建鄴戊午齊軍棄魯山城走詔南豫州刺史程靈洗守之丙子衡陽王昌沈于江夏四月丁亥立皇子伯信為衡陽王奉獻王後辛丑周明帝崩六月辛巳改謚皇祖妣景安皇后曰景文皇后壬辰詔改葬梁元帝於江寧舊塋車旗禮章悉同梁典仍依魏葬漢獻帝故事甲

午追策故始興昭烈王妃曰孝妃辛丑國哀周忌上臨于太極前殿百僚陪哭赦建鄴殊死以下秋七月丙辰立皇子伯山為鄱陽王八月壬午齊孝昭帝廢其主殷而自立戊子詔非兵器及國家所須金銀珠玉衣服雜玩悉皆禁斷丁酉幸正陽堂閱武九月癸丑彗星見乙卯周將獨孤盛領水軍趣巴湘與賀若敦水陸俱進太尉侯瑱自尋陽禦之冬十月癸巳侯瑱襲破獨孤盛於楊葉洲盛登岸築城自保丁酉詔司空侯安都率衆會

侯瑱南拒周軍十二月己亥周巴陵城主尉遲憲降庚子獨孤盛潛遁走

二年春正月庚戌大赦辛未周湘州城主殷亮降湘州平二月庚寅敕湘州諸郡三月乙卯太尉湘州刺史侯瑱薨夏六月己亥齊人通好秋七月丙午周將賀若敦遁歸武陵天門南平義陽河東宜都郡悉平九月甲寅詔以故太尉侯瑱故司空周文育故開府儀同三司杜僧明故中護軍胡穎故領軍陳擬配食武帝廟庭冬

十月癸丑霍州西山蠻率部內屬乙卯高麗國遣使朝貢十一月甲辰齊孝昭帝殂十二月甲申立始興國廟于都下用王者禮以國用不足立煮海鹽傳及權酤科先是緡州刺史留異應王琳丙戌詔司空侯安都討之是歲周武帝保定元年

三年春正月庚戌設帷宮於南郊幣告胡公以配天辛亥祀南郊詔賜民爵一級孝悌力田加一等二月梁宣帝殂閏月己酉以百濟王餘明為撫東大將軍高麗王

高陽為寧東將軍江州刺史周迪舉兵應留異甲子改鑄五銖錢三月丙子安成王頊至自周丁丑以安右將軍吳明徹為安南將軍江州刺史督衆軍南討甲申大赦庚寅司空侯安都破留異於桃枝嶺異奔晉安東陽郡平夏四月癸卯曲赦東陽郡乙巳齊人來聘秋七月己丑皇太子納妃王氏在位文武賜帛各有差孝悌力田為父後者賜爵二級九月戊辰朔日有食之以侍中到仲舉為尚書右僕射丁酉周迪請降

四年春正月丙子于阗利國遣使朝貢甲申周迪走投
閩州刺史陳寶應納之夏四月辛丑設無碍大會捨身
於太極前殿乙卯加驃騎將軍揚州刺史安成王瑒開
府儀同三司六月癸巳司空侯安都賜死秋九月壬戌
開府儀同三司廣州刺史歐陽頎薨癸亥曲赦都下辛
未周迪復寇臨川詔護軍將軍章昭達討平之冬十月
丙申大赦詔昭達進軍建安討陳寶應

五年春三月壬午詔以護軍將軍周鐵虎配食武帝廟

庭夏五月周齊並遣使來聘秋七月丁丑曲赦都下九
月城西城冬十一月己丑章昭達禽陳寶應留異送建
鄴晉安郡平甲辰以護軍將軍章昭達為鎮軍將軍開
府儀同三司十二月甲子曲赦建安晉安二郡討陳寶
應將士死王事者並給棺槨送還本鄉并復其家癸未
齊人來聘

六年春正月甲午皇太子加元服王公以下賜帛各有
差孝悌力田為父後者賜爵一級鰥寡孤獨不能自存

者穀人五斛夏四月甲寅以開府儀同三司揚州刺史
安成王頊為司空五月齊武成帝傳位於太子緯自稱
太上皇帝六月辛酉彗星見于台北周人來聘秋七
月癸未有大風自西南至廣百餘步激壞靈臺候樓甲
申儀賢堂無故自壞丙戌臨川太守駱牙斬周迪傳首
建鄴梟於朱雀航八月己卯立皇子伯固為新安王伯
恭為晉安王伯仁為廬陵王伯義為江夏王九月新作
大航冬十月辛亥齊人來聘十二月乙卯立皇子伯禮

為武陵王癸亥曲赦都下

天康元年春二月丙子大赦改元三月己卯以司空安
成王頊為尚書令夏四月乙卯皇孫至澤生賜在位文
武帛各有差為父後者賜爵一級癸酉皇帝崩于有覺
殿遺詔皇太子可即君臨萬國山陵務在儉速大斂竟
羣臣三日一臨公除之制率依舊典六月甲子羣臣上
諡曰文皇帝廟號世祖丙寅葬永寧陵文帝起自布衣
知百姓疾苦國家資用務存儉約妙識真偽下不容姦

一夜內刺閨取外事分判者輒前後相續每雞人伺漏傳籤於殿中者令投籤於階石上鎗然有聲云吾雖得眠亦令驚覺其自彊若此云

文帝天嘉六年天康一年卽位七年

廢帝諱伯宗字奉業小字藥王文帝嫡長子也梁承聖三年五月庚寅生永定二年二月戊辰拜臨川王世子三年文帝嗣位八月庚戌立為皇太子自梁室亂離東宮焚燼太子居于永福省天康元年四月癸酉文帝崩

是日太子即皇帝位于太極前殿大赦詔内外文武各
復其職遠方悉停奔赴五月己卯尊皇太后曰太皇太
后皇后曰皇太后庚寅以司空揚州刺史新除尚書令
安成王頊為司徒錄尚書都督中外諸軍事丁酉以中
軍大將軍開府儀同三司徐度為司空以鎮東將軍東
揚州刺史始興王伯茂為征東將軍開府儀同三司以
吏部尚書袁樞為尚書左僕射以吳興太守沈欽為右
僕射秋七月丁酉立妃王氏為皇后冬十月庚申享太

廟十一月乙亥周人來弔十二月甲子高麗國遣使朝貢是歲周天和元年

光大元年春正月癸酉尚書左僕射袁樞卒乙亥大赦改元賜孝悌力田爵一級辛卯祀南郊二月辛亥南豫州刺史余孝頃謀反伏誅三月甲午以尚書右僕射沈欽為侍中尚書僕射夏五月乙未湘州刺史華皎不從執政丙申以中撫軍大將軍淳于量為征南大將軍總舟師討之六月壬寅以中軍大將軍司空徐度為車騎

將軍總督都下衆軍自步道襲湘州秋七月戊申立皇子至澤為皇太子賜天下為父後者爵一級王公以下賚帛各有差九月丙辰百濟國遣使朝貢是月周將拓拔定入郢州與華皎水陸俱進都督淳于量吳明徹等大破之皎單舸奔江陵禽定送建鄴冬十月辛巳曲赦湘巴二州為皎所誣誤者十一月甲子中權將軍開府儀同三司王冲薨十二月庚寅以儀同三司兼從事中郎孔英哲為奉聖亭侯奉孔子祀

二年春正月己亥司徒安成王頊進位太傅領司徒加殊禮以新除征南大將軍淳于量為中軍大將軍及安南將軍湘州刺史吳明徹即本號並開府儀同三司庚子詔討華皎軍人死王事者並給棺槨送還本鄉仍復其家甲子司空徐度薨夏五月丙辰太傅安成王頊獻玉璽一六月丁亥彗星見秋七月戊申新羅國遣使朝貢壬戌立皇弟伯智為永陽王伯謀為桂陽王九月林邑狼牙修國並遣使朝貢冬十一月甲寅慈訓太后下

令暴帝過失廢為臨海王送還藩邸令乘輿迎太傅安
成王入即位是日帝出居別第太建二年四月乙卯薨
時年十九帝性仁弱無君人之器及即尊位刑政皆歸
冢宰故皇太后稱文帝遺志而廢焉

廢帝光大二年

高宗孝宣皇帝諱頊字紹世小字師利始興昭烈王第
二子也梁中大通二年七月辛酉生有赤光滿室少寬
容多智畧及長美容儀身長八尺三寸垂手過膝有勇

力善騎射武帝平侯景鎮京口梁元帝徵武帝子姪入侍武帝遣帝赴江陵累官為中書侍郎時有軍主李總與帝有舊每同游處帝嘗夜被酒張燈而寐總適出尋反乃見帝身是大龍便驚走他室魏平江陵遷于長安帝貌若不慧魏將楊忠門客張子煦見而竒之曰此人虎頭當大貴也永定元年遥襲封始興郡王文帝嗣位改封安成王天嘉三年自周還授侍中中書監中衛將軍置佐吏歷位司空尚書令廢帝即位拜司徒錄尚書

都督中外諸軍事光大二年正月進位太傅領司徒加殊禮劔履上殿十一月甲寅慈訓太后黜廢帝為臨海王以帝入纂皇統是月齊武成帝殂

太建元年春正月甲午皇帝即位於太極前殿大赦改元文武賜位一階孝悌力田及為父後者賜爵一級鰥寡不能自存者人賜穀五斛復太皇太后尊號曰皇太后立妃柳氏為皇后世子叔寶為皇太子封皇子江州刺史康樂侯叔陵為始興王奉昭烈王祀乙未謁太廟

丁酉分命大使觀省四方風俗以尚書僕射沈欽為左
僕射度支尚書王勣為右僕射辛丑祀南郊壬寅封皇
子建安侯叔英為豫章王豐城侯叔堅為長沙王二月
乙亥耕籍田夏五月甲午齊人來聘丁巳以吏部尚書
徐陵為尚書右僕射秋七月辛卯皇太子納妃沈氏王
公以下賜帛各有差冬十月新除左衛將軍歐陽紇據
廣州反辛未遣開府儀同三司章昭達討之

二年春二月癸未章昭達禽歐陽紇送都斬于建康市

廣州平三月丙申皇太后崩丙午曲赦廣衡二州丁未
大赦又詔自討周迪華皎以來兵所有死亡者並令收
歛并給棺槨送還本鄉夏四月乙卯臨海王伯宗薨戊
寅皇太后祔葬于萬安陵五月壬午齊人來弔六月戊
子新羅國遣使朝貢辛卯大雨雹乙巳分遣大使巡州
郡省冤屈冬十一月辛酉高麗國遣使朝貢十二月癸
巳雷

三年春正月癸丑以尚書右僕射徐陵為尚書僕射辛

酉祀南郊二月辛巳祀明堂丁酉耕籍田三月丁丑大赦夏四月壬辰齊人來聘五月辛亥高麗新羅丹丹天竺盤盤等國並遣使朝貢六月丁亥江陰王蕭季卿以罪免甲辰封東中郎長沙王府諮議參軍蕭彝為江陰王冬十月乙酉周人來聘十二月壬辰司空章昭達薨四年春正月丙午以尚書僕射徐陵為左僕射中書監王勣為右僕射二月乙酉立皇子叔卿為建安王三月乙丑扶南林邑國並遣使朝貢夏五月癸卯尚書右僕

射王勳卒是月周人誅冢宰宇文護秋八月辛未周人來聘九月庚子朔日有食之辛未大赦丙寅以故太尉徐度儀同三司杜稜程靈洗配食武帝廟庭故司空章昭達配食文帝廟庭冬十一月己亥地震是歲周建德元年

五年春正月癸酉以吏部尚書沈君理為尚書右僕射領吏部辛巳祀南郊二月辛丑祀明堂乙卯夜有白氣如虹自北方貫北斗紫宮三月壬午以開府儀同三司

吳明徹都督征討諸軍事畧地北邊丙戌西衡州獻馬
生角己丑皇孫允生内外文武賜帛各有差為父後者
賜爵一級夏六月癸卯周人來聘秋九月癸未尚書右
僕射沈君理卒壬辰晦夜明冬十月己亥以特進周弘
正為尚書右僕射乙巳吳明徹剋壽陽城斬王琳傳首
建鄴梟于朱雀航十二月壬辰詔熊曇朗留異陳寶應
周迪鄧緒等及王琳首並還親屬以弘廣宥乙巳立皇
子叔明為宜都王叔獻為河東王是歲諸軍畧地所在

剋捷

六年春正月壬戌赦江右淮北諸州甲申周人來聘高麗國遣使朝貢二月壬辰朔日有食之辛亥耕籍田夏四月庚子彗星見六月壬辰尚書右僕射周弘正卒冬十一月乙亥詔北邊行軍之所並給復十年十二月戊戌以吏部尚書王瑒為尚書右僕射

七年春正月辛未祀南郊三月辛未詔豫二兗譙徐合霍南司定九州及南豫江郢所部在江北諸郡置雲旗

義士駐大軍及諸鎮備防夏四月丙戌有星孛于大角
庚寅監豫州陳桃根獻青牛詔以還百姓乙未桃根又
上織成羅紋錦被表各二詔於雲龍門外焚之壬子郢
州獻瑞鍾六六月丙戌詔為北行將士死王事者剋日
舉哀壬辰以尚書右僕射王瑒為尚書僕射乙酉改作
雲龍神虎門秋八月癸卯周人來聘閏九月壬辰都督
吳明徹大破齊軍於呂梁是月甘露頻降樂游苑丁未
輿駕幸苑採甘露宴羣臣詔於苑龍舟山立甘露亭冬

十月己巳立皇子叔齊為新蔡王叔文為晉熙王十二月壬戌以尚書僕射王瑒為左僕射太子詹事陸繕為右僕射甲子南康郡獻瑞鍾一

八年春二月壬申以開府儀同三司吳明徹為司空夏五月庚寅尚書左僕射王瑒卒六月甲寅以尚書右僕射陸繕為左僕射新除晉陽太守王克為右僕射秋九月戊戌立皇子叔彪為淮南王

九年春正月乙亥齊主傳位於其太子恒自號太上皇

是月周滅齊二月壬子耕籍田秋七月己卯百濟國遣使朝貢庚辰大雨震萬安陵華表己丑震慧日寺刹及瓦官寺重門一女子震死冬十月戊午司徒吳明徹破周將梁士彥於呂梁十二月戊申東宮成皇太子移于新宮

十年春二月甲子周軍救梁士彥大敗司空吳明徹於呂梁及將卒皆見囚俘不反三月辛未震武庫丙子分命衆軍以備周乙酉大赦夏四月庚戌詔絳在軍者並

賜爵二級又詔御府堂署所營造禮樂儀服軍器之外
悉皆停息掖庭常供王侯妃主諸有奉卹者並各量減
庚申大雨雹六月丁酉周武帝殂閏六月丁卯大雨震
大皇寺剎莊嚴寺露盤重陽閣東樓千秋門內槐樹及
鴻臚府門秋七月戊戌新羅國遣使朝貢八月戊寅隕
霜殺稻菽九月乙巳立方明壇于婁湖戊申以揚州刺
史始興王叔陵兼王官伯臨盟甲寅幸婁湖臨誓衆乙
卯分遣大使以盟誓班下四方以上下相警言冬十月戊

子以尚書左僕射陸繕為尚書僕射十二月乙亥合州廬江蠻田伯興出寇樅陽刺史魯廣達討平之是歲周宣政元年

十一年春正月丁酉南兖州言龍見二月癸亥耕籍田秋七月辛卯初用大貨六銖錢八月丁卯幸大壯觀閱武冬十月甲戌以尚書僕射陸繕為尚書左僕射以祠部尚書晉安王伯恭為右僕射十一月辛卯大赦戊戌周將梁士彥圍壽陽剋之辛亥又剋霍州癸丑以揚州

刺史始興王叔陵為大都督總督水步衆軍十二月乙丑南北充晉三州及盱台山陽陽平馬頭秦歷陽沛北譙南梁等九郡民並自拔向建鄴周又剋譙北徐二州自是淮南之地盡歸于周矣己巳詔非軍國所須多所減損歸于儉約是歲周宣帝大象元年

十二年夏四月癸亥尚書左僕射陸繕卒己卯大雩壬午雨五月癸巳以尚書右僕射晉安王伯恭為尚書僕射己酉周宣帝崩六月壬戌大風吹壞臯門中閭秋八

月己未周鄭州總管司馬消難以所統九州八鎮之地
來降詔因以消難為大都督加司空封隨郡公庚申詔
鎮西將軍樊毅進督沔漢諸軍事遣南豫州刺史任忠
率衆趨歷陽超武將軍陳慧紀為前軍都督趨南兗州
戊辰以司空司馬消難為大都督水陸諸軍事庚午通
直散騎常侍淳于陵剋臨江郡癸酉智武將軍魯廣達
剋郭默城甲戌大雨霖丙子淳于陵剋柘州城九月癸
未周臨江太守劉顯光率衆來降是夜天東南有聲如

風水相激三夜乃止丁亥周將王延貴率衆拔歷陽任
忠擊破之禽延貴等己酉周廣陵義軍主曹藥率衆來
降冬十月癸丑大雨震電十二月庚辰南徐州刺史河
東王叔獻薨

十三年春正月壬午以中權將軍護軍將軍鄱陽王伯
山即本號開府儀同三司以尚書僕射晉安王伯恭為
左僕射吏部尚書袁憲為右僕射二月乙亥耕籍田秋
九月癸未夜大風從西北來發屋拔樹大雨雹冬十月

壬寅丹丹國遣使朝貢十二月辛巳彗星見西南是歲周靜帝大定元年遜位于隋文帝改元開皇元年

十四年春正月乙酉上弗豫甲寅崩于宣福殿時年五十三遺詔凡厥終制事從省約金銀之飾不以入塋明器皆用瓦以日易月及公除之制悉依舊準在位百司三日一臨四方州鎮五等諸侯各守所職並停奔赴二月辛卯羣臣上諡曰孝宣皇帝廟號高宗癸巳葬顯寧陵帝之在田本有恢宏之度及居尊位實允天人之屬

于時國步初彌創痍未復淮南之地並入于齊帝志復舊境惟彊弱之形縣絕故深自懲艾恐犯不韙及夫周兵滅齊乘勝畧地還至江際帝自此懼矣既而修飾都城為扞禦之備獲銘云二百年後當有癡人修破吾城者時莫測所從云

孝宣帝太建十四年

後主諱叔寶字元秀小字黃奴宣帝嫡長子也梁承聖二年十一月戊寅生于江陵明年魏平江陵宣帝遷于

長安留後主於穰城天嘉三年歸建鄴立為安成王世子
光大二年累遷侍中大建元年正月甲午立為皇太子
十四年正月甲寅宣帝崩乙卯始興王叔陵構逆伏
誅丁巳太子即皇帝位于太極前殿大赦在位文武及
孝悌力田為父後者並賜爵一級孤老鰥寡不能自存
者賜穀人五斛帛二匹癸亥以侍中丹楊尹長沙王叔
堅為驃騎將軍開府儀同三司揚州刺史乙丑尊皇后
為皇太后丁卯立皇弟叔敦為始興王奉昭烈王祀已

已立妃沈氏為皇后辛未立皇弟叔儼為尋陽王叔慎
為岳陽王叔達為義陽王叔熊為巴山王叔虞為武昌
王甲戌設無碍大會於太極前殿三月癸亥詔内外衆
官九品以上各薦一人又詔求忠讜無所隱諱己巳以
新除翊左將軍永陽王伯智為尚書僕射夏四月丙申
立皇子永康公允為皇太子賜天下為父後者爵一級
王公以下賚帛各有差庚子詔鏤刻金銀一切華綵之
屬及布帛短狹輕疎者並傷財廢業尤成蠹患又僧尼

道士挾邪左道不依經律人間淫祀祆書諸珍怪事詳
為條制並皆禁絕秋七月辛未大赦是月自建鄴至荆
州江水色赤如血八月癸未天有聲如風水相激乙酉
夜又如之九月丙午設無碍大會於太極前殿捨身及
乘輿御服大赦辛亥夜天東北有聲如蟲飛漸移西北
丙寅以驃騎將軍開府儀同三司揚州刺史長沙王叔
堅為司空征南將軍江州刺史豫章王叔英卽本號開
府儀同三司

至德元年春正月壬寅大赦改元以江州刺史豫章王叔英為驃騎將軍開府儀同三司以司空揚州刺史長沙王叔堅為江州刺史征東將軍開府儀同三司癸卯立皇子深為始安王秋八月丁卯以驃騎將軍開府儀同三司長沙王叔堅為司空九月丁巳天東南有聲如蟲飛冬十月丁酉立皇弟叔平為湘東王叔敖為臨賀王叔宣為山陽王叔穆為西陽王叔儉為南安王叔澄為南郡王叔興為沅陵王叔韶為樂山王叔純為新興

王十二月丙辰頭和國遣使朝貢司空長沙王叔堅有罪免戊午夜天開自西北至東南其內有青黃雜色隆隆若雷聲

二年春正月丁卯分遣大使巡省風俗癸巳大赦夏五月戊子以吏部尚書江總為尚書僕射秋七月壬午皇太子加元服在位文武賜帛各有差孝悌力田為父後者賜爵一級鰥寡癯老不能自存者人穀五斛冬十一月丙寅大赦是月盤盤百濟國並遣使朝貢

三年春正月戊午朔日有食之庚午鎮左將軍長沙王叔堅即本號開府儀同三司三月辛酉前豐州刺史章大寶舉兵反夏四月庚戌豐州義軍主陳景詳斬大寶傳首建鄴冬十月己丑丹丹國遣使朝貢十一月己未詔修復仲尼廟辛巳幸長干寺大赦十二月癸卯高麗國遣使朝貢是歲梁明帝殂

四年春正月甲寅詔王公以下各薦所知無隔輿阜二月丙申立皇弟叔謨為巴東王叔顯為臨江王叔坦為

新會王叔隆為新寧王夏五月丁巳立皇子莊為會稽王秋九月甲午幸元武湖肄艦艦閱武丁未百濟國遣使朝貢冬十月癸亥以尚書僕射江總為尚書令吏部尚書謝朓為尚書僕射十一月己卯大赦

禎明元年春正月戊寅大赦改元乙未地震秋九月庚寅梁太傅安平王蕭巖荊州刺史蕭瓛遣其都官尚書沈君公詣荊州刺史陳紀請降辛卯巖等帥其文武官男女濟江甲午大赦冬十二月丙子以蕭巖為平東將

軍開府儀同三司東揚州刺史丁亥以驃騎大將軍開
府儀同三司豫章王叔英為兼司徒十二月丙辰以前
鎮衛大將軍開府儀同三司東揚州刺史鄱陽王伯山
為鎮衛大將軍開府儀同三司

二年春正月辛巳立皇子恮為東陽王恬為錢唐王夏
四月戊申有羣鼠無數自蔡洲岸入石頭淮至于青塘
兩岸數日自死隨流出江是月郢州南浦水黑如墨五
月甲午東冶鑄鐵有物赤色大如數升自天墜鎔所有

聲隆隆如雷鐵飛出牆外燒人家六月戊戌扶南國遣使朝貢庚子廢皇太子允為吳興王立揚州刺史始安王深為皇太子辛丑以太子詹事袁憲為尚書僕射丁巳大風自西北激濤水入石頭城淮渚暴溢漂沒舟乘冬十月己亥立皇子藩為吳王己酉幸莫府山大校獵十一月丁卯詔剋日於大政殿訊獄丙子立皇弟叔榮為新昌王叔匡為太原王初隋文帝受周禪甚敦鄰好宣帝尚不禁侵掠太建末隋兵大舉聞宣帝崩乃命班

師遣使赴弔修敵國之禮書稱姓名頓首而後主益驕
書末云想彼統內如此宜宇宙清泰隋文帝不說以示
朝臣清河公楊素素以為主辱臣死再拜請罪及襄邑
公賀若弼並奮求致討後主使袁彥聘隋竊圖隋文帝
狀以歸後主見之大駭曰吾不欲見此人每遣間諜隋
文帝皆給衣馬禮遣以歸後主愈驕不虞外難荒于酒
色不恤政事左右嬖佞珥貂者五十人婦人美貌麗服
巧態以從者千餘人常使張貴妃孔貴人等八人夾坐

江總孔範等十人豫宴號曰狎客先令八婦人襞采箋製五言詩十客一時繼和遲則罰酒君臣酣飲從夕達旦以此為常而盛修宮室無時休止稅江稅市徵取百端刑罰酷濫牢獄常滿覆舟山及蔣山栢林冬月常多采醴後主以為甘露之瑞前後災異甚多有神自稱老子游於都下與人對語而不見形言吉凶多驗得酒輒釀之經三四年乃去船下有聲云明年亂視之得嬰兒長三尺而無頭蔣山衆鳥鼓兩翼以拊膺曰奈何帝奈

何帝又建鄴城無故自壞青龍出建陽門井涌霧赤地
生黑白毛大風拔朱雀門臨平湖草舊塞忽然自通後
主又夢黃衣圍城乃盡去繞城橘樹又見大蛇中分首
尾各走夜中索飲忽變為血有血濡階至於坐牀頭而
火起有狐入其牀下捕之不見以為祆乃自賣於佛寺
為奴以禳之於郭內大皇佛寺起七層塔未畢火從中
起飛至石頭燒死者甚衆又采木湘州擬造正寢棧至
牛渚磯盡沒水中既而漁人見棧浮於海上又起齊雲

觀國人歌曰齊雲觀寇來無際畔始北齊末諸省官人多稱省主未幾而減至是舉朝亦有此稱識者以為省主主將見省之兆隋文帝謂僕射高頴曰我為百姓父母豈可限一衣帶水不拯之乎命大作戰船人請密之隋文帝曰吾將顯行天誅何密之有使投梯于江若彼能改吾又何求及納梁蕭瑀蕭巖隋文帝愈憤以晉王廣為元帥總十八總管致討乃送璽書暴後主二十惡又散遣詔書書三十萬紙徧喻江外諸軍既下江濱鎮

戎相繼奏聞新除湘州刺史施文慶中書舍人沈客卿
掌機密並抑而不言初蕭巖蕭獻之至也德教學士沈
君道夢殿前長人朱衣虎冠頭出欄上攘臂怒曰那忽
受叛蕭誤人事後主聞之忌二蕭故遠散其衆以巖為
東揚州刺史獻為吳州刺史使領軍任忠出守吳興郡
以襟帶二州使南平王嶷鎮江州永嘉王彥鎮南徐州
尋召二王赴期明年元會命緣江諸防船艦悉從二王
還都以示威勢由是江中無一鬪船上流諸州兵皆阻

楊素軍不得至都下甲士尚十餘萬人及聞隋軍臨江
後主曰王氣在此齊兵三度來周兵再度至無不摧沒
虜今來者必自敗孔範亦言無度江理但奏伎縱酒作
詩不輟

三年春正月乙丑朔朝會大霧四塞人鼻皆辛酸後
主昏睡至晡時乃罷是日隋將賀若弼自北道廣陵濟
韓擒虎趨橫江濟分兵晨襲采石取之進拔姑熟次於
新林時弼攻下京口緣江諸戍望風盡走弼分兵斷曲

阿之衝而入丙寅采石戍主徐子建至告變戊辰乃下
詔曰犬羊陵縱侵竊郊畿逢蠱萬毒宜時埽定朕當親
御六師廓清八表內外並可戒嚴於是以蕭摩訶為皇
畿大都督樊猛為上流大都督樊毅為下流大都督司
馬消難施文慶並為大監軍重立賞格分兵鎮守要害
僧尼道士盡皆執役庚午賀若弼攻陷南徐州辛未韓
擒虎又陷南豫州隋軍南北道並進辛巳賀若弼進軍
鍾山頓白土岡之東南衆軍敗績弼乘勝進軍宮城燒

北掖門是時韓擒虎率衆自新林至石子岡鎮東大將軍任忠出降擒虎仍引擒虎經朱雀航趣宮城自南掖門入城內文武百司皆遁出唯尚書僕射袁憲後閤舍人夏侯公韻侍側憲勸端坐殿上正色以待之後主曰鋒刃之下未易可當吾自有計乃逃於井二人苦諫不從以身蔽井後主與爭久之方得入沈后居處如常太子深年十五閉閣而坐舍人孔伯魚侍焉戎士叩閤而入深安坐勞之曰戎旅在途不至勞也既而軍人窺井

而呼之後主不應欲下石乃聞呌聲以繩引之驚其太重及出乃與張貴妃孔貴人三人同乘而上隋文帝聞之大驚開府鮑宏曰東井上於天文為秦今帝都所在投井其天意邪先是江東謠多唱王獻之桃葉辭云桃葉復桃葉度江不用楫但度無所苦我自接迎汝及晉王廣軍於六合鎮其山名桃葉果乘陳船而度丙戌晉王廣入據臺城送後主于東宮三月己巳後主與王公百司同發自建鄴之長安隋文帝權分京城人宅以俟

內外修整遣使迎勞之陳人謳詠忘其亡焉使還奏言
自後主以下大小在路五百里累累不絕隋文帝嗟嘆
曰一至於此及至京師列陳之輿服器物於庭引後主
於前及前後二太子諸父諸弟衆子之為王者凡二十
八人司空司馬消難尚書令江總僕射袁憲驃騎蕭摩
訶護軍樊毅中領軍魯廣達鎮軍將軍任忠吏部尚書
姚察侍中中書令蔡徵左衛將軍樊猛自尚書郎以上
二百餘人文帝使納言宣詔勞之次使內史令宣詔讓

後主後主伏地屏息不能對乃見宥隋文帝詔陳武文
宣三帝陵總給五百戶分守之初武帝始即位其夜奉
朝請史普直宿省夢有人自天而下導從數十至太極
殿前北面執玉策金字曰陳氏五帝三十二年及後主
在東宮時有婦人突入唱曰畢國主有鳥一足集其殿
庭以觚畫地成文曰獨足上高臺盛草變為灰欲知我
家處朱門當水開解者以為獨足蓋指後主獨行無衆
盛草言荒穢隋承火運草得火而灰及至京師與其家

屬館於都水臺所謂上高臺當水也其言皆驗或言後主名叔寶反語為少福亦敗亡之徵云既見宥隋文帝給賜甚厚數得引見班同三品每預宴恐致傷心為不奏吳音後監守者奏言叔寶云既無秩位每預朝集願得一官號隋文帝曰叔寶全無心肝監者又言叔寶常沉醉罕有醒時隋文帝使節其酒既而曰任其性不爾何以過日未幾帝又問監者叔寶所嗜對曰嗜驢肉問飲酒多少對曰與其子弟日飲一石隋文帝大驚及從

東巡登芒山侍飲賦詩曰日月光天德山河壯帝居太
平無以報願上東封書并表請封禪隋文帝優詔謙讓
不許後從至仁壽宮常侍宴及出隋文帝目之曰此敗
豈不由酒將作詩功夫何如思安時事當賀若弼度京
口彼人密啓告急叔寶為飲酒遂不省之高顗至日猶
見啓在牀下未開封此亦是可笑蓋天亡也昔苻氏所
征得國皆榮貴其主苟欲求名不知違天命與之官乃
違天也隋文帝以陳氏子弟既多恐京下為過皆分置

諸州縣每歲賜以衣服以安全之後主以隋仁壽四年十一月壬子終於洛陽時年五十二贈大將軍封長城縣公諡曰煬葬河南洛陽之芒山


後主至德四年禪明二年即位六年

右陳五主凡三十三年為隋所滅



通志卷十四

財團
法人
佛陀
教育
基金會
釋淨空



總校官庶吉士臣侍朝
校對官檢討臣王坦修
謄錄監生臣郭逢綽